

Կարծիք

Ռուզաննա Նորիկի Սայիյանի

«Հովհաննես Գրիգորյանի պոեզիայի առանձնահատկությունները»
ատենախոսությունը

Ռուզաննա Սայիյանի ատենախոսությունը նվիրված է անցյալ դարի 60-70-ական թթ. գրական նոր սերնդի առաջատար բանաստեղծ Հովհ. Գրիգորյանի պոեզիայի առանձնահատկությունների ուսումնասիրմանը:

Ատենախոսության առաջին՝ «1960-ականների գրական նոր սերնդի ուղին» գլխում ատենախոսը ներկայացրել է սերնդի անցած ճանապարհը, ինքնատիպ լեզվամտածողությունն ու աշխարհընկալումը, պոեզիա բերված նորույթը՝ վերլիբրը՝ յուրօրինակ խորքով ու արտահայտությամբ, և գրաքննադատության արձագանքն այդ ամենին: Հանգել է հետևյալ եզրահանգման. «Հիրավի, նոր սերունդը հավատարիմ մնալով իր արվեստի արյան անկեղծությանն ու դավանանքին, ասում է իր նոր խոսքը, որն, ի դեպ, ազատ ու անկաշկանդ է ստեղծագործական մտածողության ու վերարտադրման ձևերում: Պատահական չէ, որ վերլիբրը դարձել է նոր սերնդի պոեզիայի կառուցակարգ»:

Ատենախոսության երկրորդ՝ «Լեզնանքը Հովհաննես Գրիգորյանի պոեզիայում» գլխում ատենախոսը կարողացել է տեսնել Հովհաննես Գրիգորյանի ստեղծագործությունների հոգեբանական խորքը, հեզնանքով ստվերված իրականության ողբերգությունները: Տեղին է ասված. «Հովհաննես Գրիգորյանը «անբանաստեղծական» անակնկալներով ազդարարեց մի նոր հեղաշրջում՝ հավատարիմ մնալով իր՝ «արվեստի արյունն անկեղծությունն է» դավանանքին:

Հովհաննես Գրիգորյանը հայրենի քնարերգության մեջ ստեղծեց իր դպրոցը, ատենախոսը կարողացել է ժամանակակիցների ընդհանուր համապատկերում ցույց տալ բանաստեղծի տաղանդի մեծությունը, նրա պոեզիայի առանձնահատկությունները:

Ժամանակին ես այսպիսի բնորոշում եմ տվել Հովհ. Գրիգորյան բանաստեղծի հեղափոխական տեսակին. «Չարենցի ու Սևակի ժառանգորդությամբ երգի հեղափոխական է նաև Հովհաննես Գրիգորյանը: Ինչո՞վ: Նախ՝ դարի առաջադրած գլխավոր՝ «անբանաստեղծական բանաստեղծության» վարպետ կիրառությամբ: Եվ ապա՝ մեր ազգային դիմագծի ամբողջականությամբ: Նա տեղ չի թողնում երգում ամբողջականության ֆունկցիոնալ խախտումների համար: Ծաղի ճյուղին կանաչ տերև չի սազեցնում՝ գարնան պատրանք ստեղծելով, ծառարմատին ցող է

կաթեցնում սիրո, հողի, արևի ու, խնդրեմ, «գարունն այստեղ է»։ «...եվ ահա նրա առաջին տերևը տեղ է հասել, ինչն է զարմանալի՝ բոլորովին անվնաս»։ <...> Հովհաննես Գրիգորյանը հոգեբան բանաստեղծ է։ Եվ այստեղ նա ամենահինքնատիպն է ժամանակակից քնարերգության մեջ։ Հայ և համաշխարհային գրականության ավանդների յուրացման ու համադրման նրա սկզբունքային կիրառումների մեջ առանցքային տեղ ունի Դոստոևսկու դասը։ Հովհաննես Գրիգորյանը պահի նկարագրությունների չի դիմում՝ ժամանակի կերպարը ներկայացնելու համար, պարզապես նա գնում է հոգեսույզ որոնման»։

Ատենախոսը հստակորեն ցույց է տվել Հովհ. Գրիգորյանի ստեղծագործություններում արտացոլված ժամանակը, նրա մեջ ապրող մարդուն, որն անթաքույց սիրահարված է օրվան՝ որպես կյանքի հրաշքի։ Ընկալել ու սիրել օր - իրողությունը՝ անկախ ամեն ինչից։ Մեկ ուրիշ բացարձակ իրողություն է հայրենիքը՝ «կրծոտված մեղրաբլիթը», որից մնացել է բռաչափ պատառ, իսկ բանաստեղծը հատուկ տեղ ունի նրանում։

Պատահական չէ, որ պատերազմների մղծավանջով անցած հայուհին շատ խորն ու հուզական է մոտենում Հովհ. Գրիգորյանի հայրենեղբերին, զգում տողատակերի տազնապն ու ցավը, որոնք ասես հրամայում են. «...և սերն ու ցավը քեզ ասում են ապրիր»։

Ապրեցնող ու ապրումակցող է Հովհ. Գրիգորյանի հատկապես հետանկախության շրջանի ստեղծագործությունները, որում առավել ակնառու է բանաստեղծի կեսադիրքը, գաղափարական դիրքորոշումը։ Ճիշտ է նկատել ատենախոսը. «Խոսքը հատկապես կերպափոխվող հասարակության համահարթեցվող որոշ արժեքների ու բարքերի, իրականության այս կամ այն երևույթի կամ անշրջելի իրողությունների մասին է։ Հովհ. Գրիգորյանն ունի գաղափարների ու արժեքների սեփական աշխարհը, որում ինքն ապրում է՝ հակադրվելով իրականությանը»։

Երկրորդ գլխի եզրահանգումը հետևյալն է. «Հովհ. Գրիգորյանի մինչանկախության շրջանի պոեզիային բնորոշ են ինտելեկտուալ և հուզական ապրումները, պոեզիայի էպիկականացումը՝ վերլիբրի կիրառմամբ։ Հետանկախության շրջանի ստեղծագործությունները ևս յուրատիպ են խոհի, ըմբռնման, համոզմունքների ու հետաքրքրությունների արտացոլման առումով։ Մի ամբողջ աշխարհ կա գրիգորյանական պոեզիայում, որն ընթերցողի առաջ բացում է հայրենիքը սիրելու, ճշմարիտ ապրումին ու խոհին հարազատ լինելու մղումը»։

Երրորդ՝ «Հովհաննես Գրիգորյանի պոեզիայի բանարվեստը» գլխում ատենախոսը ներկայացրել է Հովհ. Գրիգորյանին՝ որպես ինքնատիպ լեզվամտածողություն ունեցող բանաստեղծի, ով բառ- պատկերի նորովի կերտողն է՝ ազատ ձևաչափով։ Այս գլխի եզրահանգումն հետևյալն է. «Նաև բանարվեստի մեջ է արտահայտված Հովհ. Գրիգորյանի բանաստեղծական տեքստի ճշմարտությունը՝ իրականության ու ասելիքի հարաբերակցությամբ։ Պատահական չէ, որ նրա

բառապաշարի լեզուն աչքի է ընկնում իր անկեղծությամբ, պարզությամբ ու չհորինվածությամբ»:

Թե՛ որպես գեղագետ, թե՛ որպես մտածող Հովհաննես Գրիգորյանը բոլորովին նոր երևույթ է մեր քնարերգության մեջ: Նա իր մնայուն տեղն ունի հայոց մեծերի դասակում: Եվ ողջունելի է նրա պոեզիայի գեղագիտական ու գաղափարական առանձնահատկությունների լուսաբանմանը նվիրված Ռուզաննա Սայիյանի աշխատանքը:

Ատենախոսը հասել է իր նպատակին՝ համակողմանիորեն բացահայտելով ու մեկնելով Հովհ. Գրիգորյան բանաստեղծին ու նրա ստեղծագործությունները: Այն ծանրակշիռ գործ է: Ես միջնորդում եմ, որպեսզի ՀՀ ԳԱԱ Մ.Աբեղյանի անվան գրականության ինստիտուտի գիտական խորհուրդը բանասիրական գիտությունների թեկնածուի գիտական աստիճան շնորհի «Հովհաննես Գրիգորյանի պոեզիայի առանձնահատկությունները» գիտական ատենախոսության հեղինակին:



Վարդան Հակոբյան /

Shi /

Ստեփանակերտի «Գրիգոր Նարեկացի» պետհավարարմագրված համալսարանի ռեկտոր, բանասիրական գիտությունների դոկտոր, պրոֆեսոր

11.10.2021թ.